

Headlines

- 1 जम्मू-कश्मीर च पिछले 35एं बरें दौरान ऐकती सब्बनें शा मता 58 इशारिया 4-6 प्रतिशत मतदान दर्ज, निर्वाचन आयोग नै इसी लोकतंत्र च गैहरे विश्वास दा प्रतीक करार दिंदे होई जम्मू-कश्मीर दे लोकें गी ममारकबाद दिती ऐ।
- 2 प्रधानमंत्री नरेंद्र मोदी होरें जम्मू-कश्मीर च रिकार्ड मतदान दी सराहना कीती। पुंछ दे लोकें इस सराहना लेई मोदी हुंदा आभार प्रगट कीता ऐ।
- 3 आदर्श आचार संहिता लागू होने दे बाद जम्मू-कश्मीर च चुनां विभाग नै 95 करोड़ रपे नकद ते पक्ख च करने लेई दिती जाने आलियां होर केई चीजां जब्त कीतियां न।
- 4 औंदे इक हफ्ते दौरान बी जम्मू-कश्मीर च गर्मी कोला कोई खास राहत दे आसार नेई न।

<><><><><><>

ECI-J&K Voter

जम्मू-कश्मीर च पिछले 35एं बरें दौरान होए दे चुनाएं च ऐगती सब्बनें शा मता 58 इशारिया 4-6 प्रतिशत मतदान दर्ज कीता गेआ ऐ ते 2024 आले लोकसभा चुनाएं च लोकें दी शमूलियत अपने आपै च इक रिकार्ड ऐ। एह इस्स गल्लै दी बी सारत ऐ जे इत्थूं दे लोकें दा भारतीय संविधान ते लोकतंत्र च बसाह भरोसा किन्ना मता, गैहरा ते मजबूत होई चुके दा ऐ ते लोकें बंधी-चड्डिए वोट पाने दे अपने संवैधानिक अधिकार दा इस्तेमाल कीता ऐ। जम्मू-कश्मीर केंद्र शासित प्रदेश च कुल 5 लोकसभा हल्के न जिंदे च. श्रीनगर, बारामुला, अनंतनाग-राजौरी, उधमपुर ते जम्मू शामिल न। कश्मीर घाटी दिएं सीटें जिंदे चा श्रीनगर च 38 इशारिया 4-9 प्रतिशत, बारामुला च 59 इशारिया 1 प्रतिशत, ते अनंतनाग राजौरी लोकसभा हल्के च 54 इशारिया 8-4 प्रतिशत लोकें वोट पाए न जिसलै जे जम्मू प्रांतै दी उधमपुर-डोडा-कठुआ सीट पर 68 इशारिया 2-7 प्रतिशत ते जम्मू रियासी हल्के च 72 इशारिया 2-2 प्रतिशत मतदान दर्ज कीता गेआ ऐ। मुख् निर्वाचन आयुक्त राजीव कुमार होरें एह्दे लेई मतदाताएं गी ममारकबाद ते शुभकामनां दितियां न।

<><><><><><>

Poonch-Residents

प्रधानमंत्री नरेंद्र मोदी हुंदी सोशल मीडिया पोस्ट पर पीर पंचाल खित्ते दे लोकें दा आभार जताया ऐ। लोकें प्रधानमंत्री हुंदी शुभकामना ते खित्ते च लोकसभा चुनाएं दौरान रिकार्ड मतदान आली पोस्ट लेई आभार व्यक्त कीता। इलाके दे लोकें दा आखना ऐ जे उनें खित्ते दे विकास ते प्रगति लेई मतदान कीता ऐ। अनंतनाग हल्के च लोकें दी लोकतांत्रिक प्रक्रिया च बड़ी मती शमूलियत गी दिखदे होई प्रधानमंत्री होरें लोकें गी मुबारकबाद दिती ही। उनें पैहले दे मुकाबले च होए दे बड़े मते मतदान गी बी उजागर कीता। लोकें इस पर अपनी खुशी जाहिर कीती। स्याङ्ग जिला संवाददाता कन्नै गल्ल करदे होई पीपल्स फोरम पुंछ दे अक्ष होरें आखेआ।

<><><><><><>

J&K Cash Seized

चुनां प्रशासन नै 16 मार्च 2024 यानि जदूं सोयां आदर्श आचार संहिता लागू होई ऐ, अदूं थवां अजे तगर 95 करोड़ रपे दी नकदी ते होर दुइयां चीजां जब्त कीतियां न। जम्मू-कश्मीर च अनंतनाग राजौरी लोकसभा सीट लेई होए दे मतदान कन्नै गै जम्मू-कश्मीर च एह चुनां सम्पन्न होए दे मतदान नै पिच्छले केई दहाकें दा रिकार्ड त्रोडी दित्ता ऐ। चुनां सरबंधी मैहकमे नै आखेआ ऐ जे मतदाताएं गी अपने पक्ख च करने लेई किश मेदवारें आस्सेया पैसा, शराब ते होर दुई चीजें दा इस्तेमाल करने दी कोशिश कीती गेई। चुनां प्रशासन गी ई-विजिल ऐप राएं 143 शकैतां हासिल होइयां जिंदे चा 80 दा नबेड़ा करी दित्ता गेआ ते बाकी पर कार्रवाई जारी ऐ।

<><><><><><>

## President-Murmu

राष्ट्रपति द्रौपदी मुर्मू होरें आखेआ ऐ जे स्वार्थ थवां उप्पर उठिए जन कल्याण यानि सब्बनें दी भलाई बेहतरी दी भावना कन्नै कम्म करना आंतरिक आध्यात्मिकता दी सामाजिक अभिव्यक्ति ऐ। उनें आखेआ जे आध्यात्मिक सशक्तिकरण गै असल सशक्तिकरण ऐ ते आध्यात्मिक मूल्य सारे धर्म दे लोकें गी इक दुए कन्नै जोडदा ऐ। राष्ट्रपति मुर्मू होर नमीं दिल्ली च भारत मंडपम च ब्रह्मकुमारी आस्सेआ आयोजित इक समारोह च स्वच्छ ते सेहतमंद समाज आस्तै आध्यात्मिक सशक्तिकरण दे राष्ट्रीय कार्यक्रम गी संबोधित करा रदियां हियां। राष्ट्रपति होरें आध्यात्मिक मुल्लें सरबंधी कार्यक्रम आयोजित करने लेई ब्रह्मकुमारी संगठन दी सराहना कीती। उनें गलाया जे ब्रह्मकुमारी संगठन महिलाएं आस्सेआ चलाया जाने आला दुनिया दा सब्बनें थवां बड्डा संगठन ऐ।

<><><><><><>

## SSP-Kishtwar

एस.एस.पी किशतवाड अब्दुल क्यूम होरें जिल पुलस लाइन किशतवाड च सुरक्षा जायजा बैठक लाई। बैठक च औंदे त्यौहारें ते यात्राएं दी तयारिएं दा जायजा लैता गेआ। बैठक च A.S.P., S.D.P.O., S.H.O. ते होरनें दुएं अधिकारिएं हिस्सा लैता। इस दौरान एसएसपी किशतवाड होरें सुरक्षा ते आपराधिक सरबंधी बक्ख-बक्ख पैहलुएं पर चर्चा कीती। इस दौरान बक्ख-बक्ख मामलें दा रिकार्ड ई-सरिस्ते राएं रक्खने, मामले ते औंदे पर कीती गेदी कार्रवाई दी निगरानी वगैरा पर बी तक्क रक्खने लेई आखेआ गेआ। एसएसपी किशतवाड होरें बैठक च मौजूद अफसरें गी हिदायत कीती जे ओहू मते सौहगे रौहन, नाकें गी होर बेहतर बनान तां जे कुसै बी माडी घटना गी रोकेआ जाई सकै।

<><><><><><>

## Reasi-Panasa Village

रियासी जिले च माहिर डाक्टरें दी इक टीम नै जिले दे पनासा गां दा दौरा कीता जित्थे इक अजीब बमारी दे कारण केई लोकें च इक चाल्ली दी अक्षमता विकसित होंदी आ करदी ऐ। जिला विकास कमिशनर विशेष महाजन हारें इस अजीब जनेई बमारी बारै अपने सोशल मीडिया एक्स पर जानकारी दिती ऐ जे उनें सेहत मैहकमे गी डॉक्टरें दी इक टीम पनासा गां च भेजने लेई आखेआ हा तां जे माहिर डॉक्टर इस बमारी दे पिच्छे दे कारणें दा पता लाई सकन। उनें आखेआ जे प्रभावित परिवारें गी हर मुमकिन मदाद उपलब्ध कराई जाग। स्हाडे जिला संवाददाता देवेन्द्र ठाकुर कन्नै गल्ल करदे होई डी.सी होरें आखेआ।

<><><><><><>

## Heat Wave JK

जम्मू-कश्मीर च बी गर्मी दा कैहर बरोबर जारी ऐ-पर राहत आली खबर एहू ऐ जे मौसम विभाग दे श्रीनगर केंद्र प्रभारी डॉ. मुख्तार अहमद होरें आखेआ ऐ जे औने आले दिनें च किश-किश थाहें गर्जी-चमकिए हल्के दर्जे दी बरखा बरने दे आसार न अजे कि आम तौरा पर इस म्हीने दे खीरै तोड़ी मौसम खुशक गै रौहगा। उआं औंदे म्हीने दी पैहली ते दो तरीक गी किश टामीं-टामीं थारें पर गर्जी चमकिए बरखा बरने दी मेद दस्सी गई ऐ। एहूदे नै कश्मीर घाटी दे ज्यादातर हिस्सें च गर्मी ते खुशक मौसम कोला राहत थ्हागे जिसलै जे जम्मू प्रांतै दे किश प्हाडी इलाकें च मौसम च बेहतरी औगा। उआं अगले 7एं दिनें दौरान जम्मू प्रांतै दे झिगडे इलाकें च खुशक ते गर्म मौसम कोला राहत थ्हागे दी कोई मेद नैई दस्सी गई ऐ। जबरदस्त गर्मी दा इक होर गेड 3 जून दे बाद शुरू होने दी पेशनगोई कीती गई ऐ। डॉ. मुख्तार होरें लोकें गी सलाह दिती ऐ जे दिनें 12 बजे कोला लेइए 3 बजे तोड़ी बाहर निकलने कोला परहेज करन, टकोहदा करिए बुजुर्ग ते न्याणें ते कन्ने पानी जिन्ना होई सकै पींदे रौहन।

<><><><><><>

## Massive Fire Rajouri

राजौरी जिले दे जंगली इलाके च बड़ी मती अगग लगगी गई ऐ। एहू अगग बथूनी आले जंगलें च लगगी ते 7 थवां 8 एकड़ च फैली गई जेदे कन्नै पेड़-पौधे ते जंगली जीवन दा नुकसान होआ ऐ। जंगलें दी राक्खी हिफाजत सरबंधी बल नै अगग पर काबू पाने लेई व्यापक अभियान चलाया। अधिकारी मुजब अगग पर काबू पाई लैता गेआ ऐ।



## DC-Doda

कस्बे च साफ-सफाई बनाई रखवने दे मकसद कन्नै म्युनिसिपल कौंसल डोडा नै इक व्यापक मुहिम दी शुरूआत कीती ऐ। एहदे तैहत बजारें, गलिएं च फिरा रदे अवारा जानवरें गी फगडिए उनेंगी शैहर दी हद दे बाहर रक्खेआ जाग। इस गें दा मकसद लोकें दी सुरक्षा ते साफ-सफाई गी यकीनी करना ऐ। इस जत्त तैहत कौंसल दी लोकें दी सुरक्षा प्रति बचनबद्धता दा पता लगदा ऐ। आकाशवाणी कन्नै गल्ल करदे होई डोडा दे डिप्टी कमिशनर हरविंद्र सिंह होरें गलाया।



## SCS-Inspections

तैह रेट कोला मते पैहे लैने आले सांझे सुविधा केंद्रें दी नकेल कस्सदे होई सूचना प्रौद्योगिकी मैहकमे दी जांच टीमें चानचक्क मारे गेदे छापे दौरान जम्मू ते कश्मीर दौनें प्रांतें च 6 सुविधा केंद्रें दे लाइसेंस रद्द करने दी सफारश कीती ऐ। मैहकमे दी कमीशनर सैकरेटरी प्रेरणा पुरी होरें जम्मू प्रांतै दे साम्बा ते जम्मू जिले ते कश्मीर प्रांतै दे बडगाम जिले च चानचक्क छापे मारे हे जिस दौरान एह पाया गेआ जे किश सुविधा केंद्र सरकार आस्सेया तैह रेट कोला मता पैहा लोकें कोला लै करदे हे। इनें जांच छापें दौरान जम्मू प्रांत च 3 ते घाटी च बी 3 सांझे सुविधा केंद्रें गी इस मामले च कसूरवार पाए जाने पर इंदे लाइसेंस रद्द करने दी सफारश कीती गेई। ध्यानजोग ऐ जे सूचना प्रौद्योगिकी मैहकमे नै बक्ख-बक्ख नागरिक आनलाइन सेवा लेई 20 रपे ते सरकारी कम्म सरबन्धी सेवा लेई 75 रपे फीस तैह कीती दी ऐ।



## Army-Doda

डोडा जिले दे पोस्ता इलाके च अज्ज भारतीय फौज आस्सेआ सड़क सुरक्षा ते ट्रैफिक जागरूकता बारै इक अभियान चलाया गेआ। डोडा जिले च मती बारी सड़क हादसे पेश औंदे न जिंदे कारण कीमती जानी नुकसान बी होंदा ऐ ते मती बारी इंदा कारण लापरवाही कन्नै गड्डी चलाना या ट्रैफिक नियमें दी पालमा नेई करना होंदा ऐ। अज्ज दे जागरूकता अभियान दौरान 25 कोला मते लोकें जिंदे च टैक्सी, बस ते होर गड्डियां चलाने आले शामिल हे, गी ट्रैफिक नियमें दी जानकारी दिती। उनेंगी दस्सेया गेआ जे शराब पीए या कोई बी नशा करिए गड्डी चलाना अपनी ते होरनें दी जान खतरे च पाना ऐ। ड्राइवर्स एसोसिएशन डोडा ते मकामी प्रशासन नै फौज दे इस जत्त दी सराहना करदे होई आभार प्रगट कीता।

